

## YEMESI

# Ai koyoto epi'ehina fayahi

<sup>1</sup> Nani Yemesita Hu'mamofifi koko pana'a to Sipi Bo Yesu Kilisitohi pana'amofita nani'ni fayahi nokoyobe. Lenali Isilaeli bona'magihi naga'i nayahi luga luga su hoto nigigusaga loemo leke ho malago tili tele hite bi'ahana bonatogati Yesuhi naga'a lolo hi'ahanamagihi keke'i lu epoloto ya'ma fayahi nokoyobe.

*Keheli ule'ale huse'namu to lugufa le'mo ho metise'na*

<sup>2-3</sup> Nigibo nagabose, kalana'i nemele lepelenogomo yamofifi enimi'i melenogo lenali ule'a'ale hite keheli'ahanamofifi hapa'a huto hilibe lite keheli'ehite keheli sibina mehise lenegelo bite minalo. Lenali mono kagu amuya malalabe lite kalana'i mele lepalalana nasana yamagi lenele'mo bati hilune'mu nehabe. <sup>4</sup> Kalana'i nemele lepelenogomo fulu hite ule'ale hite minalana yamofifi komopatinigu mone sibina mehise bati hinogo mino lite bite minalana'mu yabe. <sup>5</sup> Lenalitogati bo moneuba keheliya ise'na'amu sa sa hulotomo Hu'mamofitoga loka henogo emilube'mu nohibe. Hu'mau ya'ma bona'i asaga'i enele'mo hetofa huto nohina bouba ka meepekise ana'ina kehelise'na sipi huto epilata nohibe. <sup>6</sup> Ana'ina lilufi melilufi luto ekesa loe lae mekehelise keheli monekoto moloto Hu'mamofitoga lino. Ekesa loe kehelilina bona'i yamofifi yasi lito hege nagami i bili fu ilata

nohina ya suhi huto minalina'mu yabe. <sup>7-8</sup> Bona'i ya hana'amagi bego bego hite humofa'na bilata nehanaya ana'ina Sipi Bomofitogati mone melilana'mu yabe.

*Yogo fe'noha'a hiti muhi ni'ina bo*

<sup>9</sup> Muhi meni'ina bona'i lenali'i Hu'mau lenele'mo bati hulata nohina'mu yamofahi legegelo bite minalo. <sup>10</sup> To yogo fe'nohatini hiti bona'i lenali fe'no kumu mekeheli'ahana yana'mu lenegelo bite minalo. Fe'noho bona'magi kifina haya'a uya'i loto i helili huto limo noina suhi hite limo ilana'mu yabe. <sup>11</sup> Yegeuba tito nolenogo kifina haya'a i pigilina'mu yabe. Uya'i loto limo ilenogo okaba'a sekuya bito fenene hilina'mu yabe. Ana hite, fe'noha'ani hiti bona'i to foya'aniga nebite haya kalalana'mu yabe.

*Kalana'i molo epolose'na to fi taga huse'na*

<sup>12</sup> Kalana'i nemele lepelenogomo fili tegi hite meminalana'a yamagi enegelo bite minalana'mu yabe. Fi taga hi epelenogomo su nehenogo yamofahi Hu'mamofitoga komopa'ani emite minalana bona'i epilube luto lu molo'ehina nasana yamofahi babeyafa'a minoba minoba huse'na liluta'mu yabe. <sup>13</sup> Fi taga nehi lepelenogo yamofahi Hu'mau fi taga nohu letafite melilo. Bo moneubafi nasana moneubafi foipa nasanauba Hu'mamofahi fi taga mehu etalube'mu nohibe. To nasana foipana mone kumu Hu'mau fi taga hu etalina'a meni'ibe. <sup>14</sup> Fi taga hu epolose'nauba ya'ma bomofahi ipagu foipa laga besina kauba kafa kelefufi gilata

nehana suhi huto fi taga hu epololata nohibe.  
<sup>15</sup> Foipa laga'nauba panamu'i ito ketalina gi'a foipana yabe. Foipanauba panamu'i ito ketenogo pulu tilina gi'a filise'na yabe lilune.

<sup>16</sup> Komopa'ni nolepuna nalalu'nigita, haya mekalalo. Fi taga hu epololata nasana ya'ma Hu'mamofitogati meni'ibe. <sup>17</sup> Asaga nasana bati huto lele'mo lamana hulata nasana lamana'a yamofiji Hu'mamofitogati ni'ibe. Afotifu Hu'mau ai kokulumagu fi fana tolata nasana asaga'i sonofi'i hiti ikahi hiti yege hiti enele'mo huto hu'ehina boubia hetofa nasana limilata nohina yabe. Ana huto ana'ina li gelehe galaha hilata nehanaya Hu'mau anamofiji suhi menohibe. <sup>18</sup> Lali Hu'mamofiji yagapanan'amagita yata'a hapi fito lolo hilune luto Hu'mau ekesa kehel'i'ehinalo ai kaga'alo kehel'i amuya melenogo lemehati kosaba'i limi'ehibe.

### *Hu'mamofiji ka'a kehelite mege'i malalo*

<sup>19</sup> Komopa'ni nolepuna nalalu'nigita, lenali ya'ma kaga'ni kehelilo. Lenali Hu'mamofiji ka'a mele'isi nekehelite fulu hite kaga lite lenita bilina nasana'mu kaga mele'isi melilo.

<sup>20</sup> Lenita bise'na yauba Hu'mamofiji gobisalo mino lamana hilune luto ana'ina lolo huto moloto nohiluta nasanauba mone li huto mehilina'mu yabe. <sup>21</sup> Komopati filise'na to foipa nasana lilata'na yamofiji asaga'i he'mite Hu'mamofiji kaga'a komopatinigu molo'ehinamofiji li pili kete lilo. Hu'mamofiji kaga'auba lenubuto bilina nasana ni'ibe. Aimo agoya hi emilo.

<sup>22</sup> Hu'mamofiji kaga'a ya'ma kehelija ilo. Fa'mene kehelite alihia he'milana yamofiji

haya kalalana'mu yabe. Kaga'a kehelilete mege'i malalo. <sup>23</sup> Bona'i luga'amagi ya'ma Hu'mamofifi ka'a enegekesa fa'mene kehelite keheliya meilana yamofifi gapo gapolugu enokaba enabaga bu galata nehana ya suhi huto ni'ibe. <sup>24</sup> Enubulo bu gelete bite mele'isi okaba'animofifi hapa'a enegekesu holata nehana suhi huto ni'ibe. <sup>25</sup> Bona'i luga'amagi Hu'mau keya ka lu'ehina lama'naka lite enehe'mo'ehina kagamofifi Hu'mamofifi hapa'amu sa sa helite nebinogo enegekesu mehenogo keheliya ite minalana ya'ma Hu'mau lusa gi epelenogo enegelo bite minalune'mu nehabe.

<sup>26</sup> Luga'amagi enali Hu'mamofifi amuya'a kehelito nominone lite lilana'a ya bona'magi enabaga'ani kaba mehilana yamofifi bona'i ya'amagi mono ka nolupihe lite faga heletuya'a lilune'mu nehabe. <sup>27</sup> Megusa yagapanala'i to keto ana'i ete keta noepesinogo enele'mo bati hiluta to metoga bona'magihi enipakafa hose'nauba lele'mo sibina hu laligi luto kaba huto minaluta ya'ma Hu'mamofifi amuya'amu kehelito lusi mono kagalugu minaluta nasana hiti Hu'mamofifi bulo mino fe luto lama'naka, minalube'mu nohibe.

## 2

### *Bona'i fato fato'mofifi ka'a*

<sup>1</sup> Nalalu'nigitabe, lenali fana meha'a hiti bo, Sipi Bo Yesu Kilisitou kumu akeheli amuya mele'ahanamo ni'ibe. Bona'i luga'amu keke boke neli epelete bona'i luga'amu bu enogo

he'milata nehana neminana yamofahi hena'mu ya suhi hilata nehabe? Ya suhi mehilo. <sup>2</sup> Bo moneuba fayah'a gukete hekoloto yaha'aga ya'ma goli efatu lolo hi'ahana folotahi bito lenali sipi mono nonugu netinogo to bo mone salafa'a ai tafa gukete hekoloto tilina ya'ma, <sup>3</sup> lenali gukete hetofa'a hekolo'ehilina bomofahi bu gelete foke ka nelite sipi lamana'alo le'me nemelete salafa'amofahi ya'ma kai umaga buto ho tiloto minobo lite lilafiyhe? To meto fa'mene minobo lite li emilafiye? <sup>4</sup> Lenali ya hite bona'magita guna melete enele'mo fato fato nehitenegekesa foipa'a kehelite bona'i enele'mo sibina hilata nehabe.

<sup>5</sup> Nemehi nolepuna nalalu'nigita, ya'ma kaga kehelilo. Salafa'a bona'i nehabe lite nelite lilata nehana bona'i mone ya'ma Hu'mau enele'mo eto higo Hu'mamofahi gobisalo ya'ma fe'noha'ani hiti bona'i lolo hite nehabe. Ya nehago Hu'mamofitoga komopa'ani melete neminana bona'i ya'ma lu epolo'ehina suhi huto ai kapo'alo enele'mo hetofa hilina'mu yabe. To enali kehelise'na'ani aitoga ule'ale hiti le'mo sipi hilina'mu yabe. <sup>6</sup> Lenali salafa'amagi bu enogo he'milata nehanagi. To hiya huse bona'magi lenele'mo sibina hite ka foyagu lenele'me melelata nehabe? Enali fe'noha'ani hiti bona'magi yabe. <sup>7</sup> To lenigi'a liyafa hu'ehinana enali fe'noha'ani hiti bona'magi li sibina sabana nehabe.

<sup>8</sup> To ya'mu mono bukugu Hu'mau keya ka lu'ehina kaguti amuya ka mone ma luto ni'ibe: *Kaika'mu kehelilata nohata ya suhi*

*huto kalalukagi kumu kehelito kaba hu epoloto komopaka epibo*, luto lu'ehinamo ni'ibe. Lenali ana keya ka lu'ehina ka'a keheliya ilana ya'ma ana'ina lamana'a lilana ni'inaya. <sup>9</sup> To lenali bona'a mone'amagihi enofokehi hete enele'mo bati nehite bona'i mone'amagihi bu enogo he'milana nehite yamofahi foipana'a lilana'a huto ni'inaya Hu'mau ya'ma keya ka lu'ehina ka'a akehelih he'mi'ahabe luto ka foyagu lenele'mo melalina'mu yabe. <sup>10</sup> Bo moneuba Hu'mau keya ka lu'ehina ka'a keheli su hoto nekehelito moneko'isi he'milina yauba keya ka asaga'i pelesa neibe. <sup>11</sup> Hu'mau yama: *A'i gumina mefalalo* luto lu'ehina to ai mone hiti: *Bona'i enoho mefililoluto molo'ehina*. Lenali a'i gumina mefolose bona'i enoho fililana yamofahi Hu'mau keya ka lu'ehina ya'ma pelesa neibe. <sup>12</sup> Hu'mau lu laga huto lu'ehina kagauba lele'mo bati huto lubuto bi'ehina ka'a keheliya ilana'a hiti keheli he'milana'a hiti lele'mo nupa huto loko hu letalube'mu nohibe. Ya hu'ehina'mu kaga kehelite ana'ina nelite noluna kaga'mu kehelite minalo. <sup>13</sup> Bo mone'maka kai kiginaga mefinogo bona'i enele'mo bati mehilata ya'ma Hu'mau ana huto ginaga mefinogo enele'mo bati mehinogo ana bomofahi ka foya li etalune'mu nehabe. Kiginaga finogo keke'i luto enele'mo bati hilata bona'i ya'ma Hu'mau ana suhi huto ginaga finogo enele'mo bati hilube'mu nohibe. To ginaga fise nasanauba ka foya lilatanamofahi be ligilina'mu yabe.

*Keheli amuya mololata nasana lamana'a ni'ibe.*

<sup>14</sup> Nalalu'nigitabe. Bo moneuba nani Yesu kumu keheli amuya molo'ohube luto lilina ai ya'ma mono ka lamana'a mone mege'i memelenogo sapuya'a lolo hilube'mu nohibe. Ya huloto keheli amuya moloto bilina ya'ma Hu'mau buto bilifihe? Bati mehu'ehina. <sup>15</sup> Bo moneubafi a'i mone'ifi silaga gukete'mufi nose'namu sa sa nehinogo, <sup>16</sup> lenalitogati moneuba ma luto lu epilina: Nalalu'nigitabe. Nehafihe? Bati hite minalo. To mukoho'a hiti lenumu hinogo minalo luto lu epilinaya enehe'moto enubuto mebilina yamofahi futu'a lilina'mu yabe. <sup>17</sup> Bona'i luga'amagi enali keheli amuya melete mono ka legeya'a mone melilana ya'ma Hu'mamofi kumu keheli amuya malalana'a pata si'ehinamo ni'ibe.

<sup>18</sup> Bo moneuba noluna ka o'e a'e nolinogomo ma luto lu emilunamo ni'ibe: Kai ya'ma keheli amuya molo'ahataya nani ya'ma mono ka legeya'a lilata nohubo. Mono legeya'a menelepise keheli amuya mololata hu'ahata'asigo nelepileta yamofahi nani mono ka legeya'a lilata nohuna ya'ma kelepinogo'ni keheli amuya nomolon-amofahi hapa'a fa'mene kehelilane luto hilube'mu nohubo. <sup>19</sup> Lenali ya'ma afotifu, Hu'ma moneko'isi nohibe lite lilata nehanafiye? Bati huto ya'ma ka legeya'a nelanaya foipa felemagi ana hite kehelilete sipi enelesa ligo topa hete nehabo. <sup>20</sup> Lenali ka keheli sibina hise naga'ise. Lenali kumu nolube. Bona'i luga'amagi keheliya ilana mono kamofahi legeya'a mone melilana ya'ma keheliya ise'na'ani pata si'ehibe luto nolube. <sup>21</sup> Tatatifahi Abalahai ai kumu lilugi ke-

heli'ehilo. Hu'mau aimo henabe luto le'mo bati hu'ehibe? Mono ka keheli'ehinamofi kumu yabe luto le'mo bati hu'ehifiye? O'e. Ai Hu'mamofihī ka'a kehelito agoya hu emi'ehina'mu yabe luto le'mo bati hu'ehina. Abalahau ya'ma Hu'mau lu emi'ehina ka'a mege'i moloto pana'a Isakaha kuguhi koyo emilube'mu nohigo Hu'mau keheliloto le'mo lamana hu'ehina kaga ya'ma keheli'ahabe. <sup>22</sup> Ya hu'ehina ai keheli amuya molo lito buto mono ka legeya'a lito buto mono ka lamana'a lu'ehina yamofihī kehelito mino amuya moloto keheli su ho'ehinamofi keheli'ahabe. <sup>23</sup> To mono ka bukugu ka mone ma luto ni'ibe: *Abalahau ai Hu'mamoftoga agoya hu'ehina'mu yabe luto Hu'mau keheli emigo foipana'a meni'igo mino'ehinamo ni'ibe*, luto lu'ehina. Hu'mau ai: *Nibita hina nalalu'nifu nohibe*, luto lulata nohibe. Abalahau ya'ma ana kagagu buto amuya molo'ehina yabe. <sup>24</sup> Kehelito amuya molose'natimu'i ya'ma keheliloto Hu'ma ai'a bulo fotogo hite nehabe luto melilune. Keheli amuya molo'ohutoti mono ka legeya'a liluta'mu keheliloto ai bulo bati hite nehabe luto lilune'mu nohune. Yamofihī akeheli'ahabe.

<sup>25</sup> To ana suhi huto koyapa'i ya'ma kapolo a'i, Lehapu ai Hu'mamofi kumu yabe luto kaga mege'i molo'ehinalo Hu'mau nubulo bati a'i nohibe luto lu'ehina. Yosuagi to bona'amagi gelehe hite me'i kosaba'i bu galabe luto enoho lifinogo Lehapu nohinaga elago ai'a Hu'mamofihī naga'i nehabe luto enele'mo nonugu moloto bona'magi bu enegete enehe lalabe luto fato kapogu enoho lifi malago bi'ahana yabe. <sup>26</sup> To bo mone'mofihī

gufa'a komopa'agu meha'a meni'igo fili'ehibe luto lilune. Ana huto bo moneuba keheli amuya malalinaya mono ka legeya'a melilina yamofifi keheli amuya molose'na'a asu ho'ehibe luto lilune.

### 3

#### *Kenetufatimofifi hapa'a*

<sup>1</sup> Nalalu'nigitabe. Lenalitogati bona'i babu lite ka lu enelepise bo lolo mehino. Hena'mube? Lali tisa foyalo bo ya'ma alihi kanagu lalitoga ka foya hofa talina'mu yabe, luto a'nokehelune. <sup>2</sup> Lali asaga'i sibina hulata nohune. Luga'amagi enali kagagu sibina mehilana ana bona'i lusiga bati hite mineme bite minalana'mu yabe. Enabaga'ani kaba hilana yamagi enugufalo ana'ina asaga'i fa'mene kaba hilanamo ni'ibe. <sup>3</sup> Hosi yagamagahi enugufa li gelehe hite bilune'mu enabaga komopa'agu mone aeoniloti lolo hite mele epelete kefe hi'ahago kaga kehelilata nehabe. <sup>4</sup> To ana huto hege nagamilugu boti ana'ina sipi ni'inaya to yasi sipi'nauba fitu fo lito lelito to bulata nohinaya lito olata bouba osaha'atu siti'a molose'na'alo le'mo bati huto melenogo li miyaga maga huto bilina'mu yabe. <sup>5</sup> Ana suhi huto kenetufati ya'ma ana'ina nesi'asi ni'inaya ana'ina nesi nesi huto liluta'a mehune luto le'mo napa napa hulata nohibe.

Logo lo tunufa'a lagaso'a yauba i kulu tiloto fi'i loto kifi legeya'a asaga'i lo su holata nohibe. <sup>6</sup> Ana huto kenetufati ya'ma logo legi huto ni'ibe, lugufamofifi nasanaguti ya'ma metoga nasana

foipana asaga'nalog a nogosuhi ni'ibe. Kenetufatiuba lugufa komopati li sibina hu su hola-tanamo ni'ibe. Logo lo tunufa'uba i kulu tito ya fa legeya'a kifi lo su ho'ehinamo ni'ina, ya suhi huto logo hep aluguti metoga bona'i asaga'nalog a kenetufati li gelehe galaha hago kagati lu sibina huto analoti luto moloto nohuta nasana ya'ma sibina holito nobibe. <sup>7-8</sup> Yaga nose'na to ya falugu kafa'nama to osifa'i to nagamilugu faya'i fato fato'mofahi silaga'i enele'mo melete enegekesa li'ehilinamo ni'ibe. To enele'mo melete enegekesa li'ahanaya kenetufati ya'ma bo moneuba ekesa melilube'mu nohibe. Kenetufatiuba ya'ma ana'ina sibina'a le'mo gelehe galaha huto fa'mene mone minalina'a mehibe. Kenetufati ya'ma nasana foipa nalisa'a fililata nasana ni'ibe. <sup>9</sup> Kenetufatiuba ya'ma Sipi Bo afotifihi fokehi holata nohune. To Hu'mau ai'asi suhi huto enele'mo huto hu'ehina bona'i ya'ma kenetufatit u huli ka epekilata gumi'i molo enoholata nohune. <sup>10</sup> Ana kenetufati monekotu enofokehi lilata nohune. To li gelehe huto huli ka lu epololata nohune. Nalalu'nigita, ya'ma laga mehina suhi ni'ibe. <sup>11</sup> Nagami'i ipi opohi monekoluguti ya'ma nolata nagami'i hiti to ekesa nagami'i hiti limilata nohifihe? O'e, bati mehu'ehina. <sup>12</sup> To kayabe'uba i gelehe huto nahabolo legeya'a golo limilifihe? To igofa'uba ya'ma i gelehe huto kayabe'i legeya'a golo limilifihe? To hege nagamiluguti nonota nagami'i mone huto hili-fihe? Ya huto huto mehilina'mu yabe.

*Kokulumaluguti keheliya ilatana*

<sup>13</sup> Folagahatiniguti bo moneuba keheliya ise bo to asaga hapa'a keheli su ho'ehina bo nohilina ai agoya bo minoto hapa'a lamana'a li huto hilinamofhi keheli'ehilina yamofhi hapa'a li huto hilina'mu yabe. <sup>14</sup> Komopatinigu lenipakafa ai hago ai hago hite siko hite minalana to fe'nohatini guna ite meepilana, ya'ma faga hiti li lalagi lenugufa lelite tite lali keheliya i'ohune lite melilo. <sup>15</sup> Ana kehelise nasana kokulumaluguti melimi'ehibe. Noto noto bona'magitogati huto nohigo mega lugufatu lilata nohune. Foipa feleuba ya'ma ana huto hite ana'ina lilo luto lohoka nohigo tafa lemehatitu lilata nohune. <sup>16</sup> Komopatinigu ipakafa ai hago ai hago hite siko nehitfe'nohi li usisi gilana foipana'a hiti minalana ya'ma bona'i sibi sibi hite aku'i ete ana'ina sibina asaga'i li sibina sabana hilana'mu yabe. <sup>17</sup> Kokulumaluguti keheliya ise'na limilina yauba hapi fito komopati gulu gulu linogo minoto agoya bonako minototi fulunamofhi hapa'a lilata nohune. To fato bona'i bu enogoloto ginaga fise'na epilotu enele'mo lamana huto yamofhi legeya'a babu luto li huto hu leto'ehina ya huloto ligitagahi huto kenetufati loe lae hinogo faga faga luto meliluta'mu yabe. <sup>18</sup> Bona'i ya'ma baba i epolose bonako minoto fuluna'amofhi legeya'a yege yege'i li huto hilube'mu nohibe. To ya'ma fuluna'amofhi legeya'a ya'ma bebe sose hapa'a ni'inagu ni'ibe.

## 4

*Mono'ani men'ina bona'i hiti mino koguna*

*meilo*

<sup>1</sup> Lenali henabe lite kenasabo bite luba hilata nehabe? Komopatinigu foipana lenibita hina nasanauba lenugufagu huto lilago luba huto hulata nohibe. <sup>2</sup> Ya nehite laga lepesina nasana'mu bona'i enoho fililune'mu nehabe. Ana'ina'mu lenegekesa yigiba yigiba hite lepesina nasana lilune'mu nehago to melepinogo kenasabo bite luba sipi hilata nehabe. Ana'ina'mu lenebesilinana melise fa'mene neminabe. To hena'mube? Lenali Hu'mamofitoga kehe meise neminabe. <sup>3</sup> To ana'ina mone kumu Hu'mamofitoga buka ti'ahanaya kehelise'natini fulu luto minatita lenalitini lenugufatiniuba kehelina'asigo aitoga lilana ya'ma Hu'mau ana'ina melephilube'mu nohibe. <sup>4</sup> Ka mekeheli'ahana bona'ise. Melugu bona'magi kumu kehelilata nehana ya suhi hite laga lepesilina nasana'mu kehelilana ya'ma Hu'mamofiji fateha'a lolo hilabe lite lenali menekehelikiye? Mono'ani meni'ina bona'magi kehelilata nehana nasana'muko lepesilina ya'ma Hu'mamofiji bona'a meminalana'mu yabe. <sup>5</sup> Lenali kehelilo. Hu'mau mono bukugu mone kaga luto lu'ehina ka'a yamofiji hapa'a futu'a meni'igo ana kaga ni'ibe: *Nani ya'ma bona'magihi komopa'anigu molo epolo'ohuna enemeha'aniuba foipana enibita hina nasana amuya'a lolo hi etalifihe?* luto lu'ehina yabe. <sup>6</sup> Ya hu'ehinaya libita hulata nohinana laga mehinana'mu kehelii meemilabe luto lele'mo hetofa hulata nohibe. Mono bukugu kaga ma luto lu'ehinamo ni'ibe: *Hu'mau ai'a enugufa*

*limo titi bona'magihi enele'mo fitu fo he'milata nohinagi agoya hu neemina'amagihi enele'mo hetofa huto enehe'molata nohibe, luto lu'ehina.*

<sup>7</sup> Yana'mu lenali Hu'mamofitoga i hepilete agoya hu emilo. To Satahi le'mo he'mite ule'ale minenogo ai koli huto bufa hilina'mu yabe. <sup>8</sup> To Hu'mamofih'i gobisalo lenifita i'ehite bilana yamofih'i ai'a ana huto lenogobisalo alina'mu yabe. Foipa nasanatini ya'ma li kele li he'milo. Kenetufatiniuba li gelehe hite loe lae nehana bona'ise, li hetele he'mite komopatini nokala hilo. <sup>9</sup> Lenali hapatinimofih'i leniginaga nefinogo sipi yibi helite nebite leniginaga fino. Kiya yokolo'i hite lenegelo mebise hilanaloti leniginaga fino. <sup>10</sup> Sipi Bomofih'i bulo limite neminana'a ya'ma ai'a lenele'mo saga hilube'mu nohibe.

### *Lenalalutinighi ka foipa epelata nasana*

<sup>11</sup> Nalalu'nigita, lenalitini ka foipa'a melilo. Moneuba ai lalu'afi kumu ka foipa'a lu etalina ai ya'ma Hu'mau keya ka lu'ehina kagamofih'i li sibina hulata nohuto ana kagamofih'i loko nohibe. Kai Hu'mau keya ka lu'ehina li sibi hilata ya'ma kegekesa yigito ka lamana'a meni'ibe luto lilatamoya, ana keya kalo mege'i mololata menohane. Ana kagamofih'i loko huto fa'mene nominane. <sup>12</sup> Hu'mau ai'a keya ka lu huto huloto kaga'a mone'a hiti noluto guna molo letalube'mu nohibe. Ai'ago lubuto bilinamo ni'ibe to ai'ago lele'mo loko hilinamo ni'ibe. Ya nohinogo ya'ma bona'magihi hapa hapa'ani heletuya'a lilata nehana yamofih'i lenali foyatini meni'ibe.

*Lolo hite minete nehana nasana'mu lenugufatini limo titi mehilo*

<sup>13</sup> Lenali yagofi yata'ifi hepa'i monetoga buto foya kana moneko'i minototi foya lilototi yogo fe'nohi babu lito li huto hilune lite lilata nehana bona'i ya'ma kaga mone lu lepilugi, keheli'ehilo. <sup>14</sup> Yagosи huto hilibe lite ana'ina ya'ma lenali mekehelibe. Lenalitini ya'ma minete lite nehana logo lokiya'a ya suhi huto ni'ibe. Logo lokiya'a notigo bona'magi kana'a nesi'a minoto bu gelago mele'isi su hoto fenene hilibe. <sup>15</sup> Yamofi kumu ma lite lilo: Hu'mau keheli'ehinogo lilina'a malalina'a kehelilune bati huto minoto ho tito muyalo umalo hilune lite, ya lilo. <sup>16</sup> Yatai ya'ma lolo hite melete nehana nasana'mu lenugufa limo titi hilata nehana yamofihи bati mehibe. <sup>17</sup> Ya hu'ehina'mu mone luga'amagi enali ana'ina lamana'a lilune lite kehelilana ana nasana melilana'a ya'ma foipanamofihи nona'a enogobisalo tito minalina gumi'i lilana'mu yabe.

## 5

*Yogo fe'noho bona'magi kumu kaga*

<sup>1</sup> Lenali fe'noho bona'magita ya'ma kaga lipoti lu nolepugi kehelilo. Fe'nohi ufeha'a hiti nasana lenalitoga huto hilinana'mu ya'ma nekehelite yibi sipi hilo. <sup>2</sup> Fe'nohatini afulupa noina yabe. Gukete lamana'a ya'ma gunako'magi a'n'e su nehanagihe. <sup>3</sup> Lenali efahatini goli hiti siliwa hiti golo notabe. Yanauba efahi li hetofa hite mine'ahana yamofihи hapa'a aliha'a huto huloto logomofihи suhi huto lenali lenugufatini

hiti fe'nohatini hiti moneko kumu lalana'mu yabe. Fe'nohi li nupa hite mele'ahanaya, metoga nasana su halina kana'a hupamone hu'ehina, menekeheliyi? <sup>4</sup> Lenali foyagu lili'nalo bomagi enogobi foya lite kifi'a laga hilago meetana suhi lite mina'a meepigo foya lelite bite yibi hafli hago amuya bo, Hu'mau ya'ma foipana'ani ekesaguti keheliloto ya'ma luto nolibe. <sup>5</sup> Lenali ya'ma metoga hite melete nehite lag'a nekehelite enibita hina'a hiti kehelite nehanaya to nose'na neba neba hite fobatini'ubago hu'ehina Hu'mau lenahalina kana'a lebato'isi ahuto hilube'mu nohibe. <sup>6</sup> Lenali bati hite nehana bona'i enifisa ite ka foya epilete neenahago enali nona'a lenahalina'a hiti lenifitul falana'a hiti meni'ibe. Lenali yogo fe'noho bona'magi ya'ma ka kehelilo.

*Kosele kasele melepahago Hu'mamofitoga loka helata nehana*

<sup>7</sup> Nalalu'nigita, Sipi Bo i behe huto alina kana'amu kosele kasele'i melenehenogo ai kumu bati hite minalo. Lenali akeheli'ahabe. Biha'a ho kefe'ahana bomagi foya'ani he kelelete kohe toto noina ko'i hiti to alihi noina ko'i hiti ilago nose'na kana huto huloto nose'na legeya'a lamana'a nalune lite kosele'i mehese minelata nehabe. <sup>8</sup> Sipi Bo i behe huto nehetilina kana'a tupa hu'ehibe. Ya'mu lenali hiti kosele'i mehese komopatini molo hetofa hite minalo.

<sup>9</sup> Nalalu'nigita, ka foya li letalina bo, Hu'mau ya'ma lebato'isi nohibe. Ya nohuto nehetilina'mu ka foya li lalagi lenali ai ka emekinogo ai ka emekinogo mehilo. <sup>10</sup> Nalalu'nigita, kalana'i nemele epalago kosele ka melise Sipi

Bomofitoga molo emite gi'a hete minelata nehana'a mone y'ama Hu'mamofifi mono ka leli'ali hi'ahana bo ya suhi hite koyapa mine'ahana. Enali'ani hi'ahana'a ana suhi hite minalo. <sup>11</sup> Keheli'ahafifhe? Enali ule'ale hite lite mine'ahana bomu'i ya'ma Hu'mau lusa gi epolo'ehina bo yabe, luto lulata nohune. Koyapa bouba Yopu ai keke'i luto minoto kosele'i mehago mino'ehina'a akeheli'ahabe. Aliha'a ya'ma Sipi Bouba ana'ina lamana'a molo eto'ehina ya'ma akeheli'ahabe. Yana'mu Sipi Bouba lalitoga ginaga fito bu goloto komopa'a limito lele'mo hetofa hu letalinamo ni'ibe, luto kehelilune.

<sup>12</sup> Nalalu'nigita, kaga amuya'a hiti ka mone lilugi kehelilo. Kokulumagu lenayahi tite lu laga mehilo. To metoga to nasana'mu fato fato'i lenayahi tite kaga melete lu laga mehilo. Hu'mamofito ka foya li lalabe. Lenali ya'ma o'yo luto lilupi to o'e luto lilupi litemo yamofifi ka'a lama'naka lite lilo.

<sup>13</sup> Folagahatiniguti moneuba keke'i luse'na gupisa'alo notigo nohuto'amo Hu'mamofitoga lino. To folagahatinigu moneuba gelo bise'na lito nohuto'amo Hu'mamofitoga fokehi hoto nama lino. <sup>14</sup> Folagahatinigu bo mone'i nobesinogo mono kaba bona'magihi kehe inogo nehetite Hu'mamofitoga loka hete Sipi Bomofifi gi'a hete mesebe nagami'i fele eteno. <sup>15</sup> Hu'mamofitoga enemehi emite keheli ule'ale hilete gi'a halana yamofifi Sipi Bouba le'mo hetofa hinogo besi'ehina bo ye koto ho tilina'mu yabe. Foipana'a ni'ilina yamofifi Hu'mau li he'mi etalina'mu yabe. <sup>16</sup> Hu'mau lele'mo ye kalibe

lite nelitemo foipanatini ai he'mi etenogo ai he'mi etenogo lu hokolo hite Hu'mamofitoga lilo. Bati hite minalana bona'magi Hu'mamofitoga loka hete ya'ma ana'ina lamana'a lilana'mu yabe. <sup>17</sup> Koyapasana Elaiyau ya'ma lali suhi huto aisisigo ko'i meilibe luto amuya moloto Hu'mamofitoga ligo kufu loebe monebe higo luga'a ikahi nayahi mone kegi'a leke ho malago ko'i mei'ehina. <sup>18</sup> Meigo alih'a ya'ma aku'i ko'i ilibe luto Hu'mamofihiloka hago kokulumaluguti ko'i igo metoga nasana asaga'i boloto ti su ho'ehina yabe.

<sup>19</sup> Nalalu'nigitabe. Lenali folagahatiniguti moneuba mono kapo'mu bego hilina yamofi kumu lalu'afu moneuba le'mo gelehe hinogo nohuto, <sup>20</sup> ai'a ya'ma kaga ma luto kehelilibe. Moneuba foipana'a hiti bona'magihi kapo sibina'aguti le'moto oto hetofa kapolo le'mo malalina boub a ya'ma ana foipana'a hiti bomofih meha'a hiti fili lalibe luto buto bito foipana'a hiti silaga'i li he'mi eto su halibe.

**Ka Lamana'a Mono'i Lu Mu Tifi'ehina Ka  
Yabe**  
**The New Testament in the Benabena Language of  
Papua New Guinea**  
**Nupela Testamen long tokples Benabena**

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

---

PDF generated using Haiola and XeLaTeX on 11 Nov 2022 from source files  
dated 9 Oct 2020

429cb299-5ab9-51c4-8857-9de5c72f8388